



點心

行過麵包店，堵好條麵包出爐個時節，一陣陣個香味，順等風傳入鼻公，就係這種味緒，乳油、麵粉烤過個火喇味，看著店頭架仔項，排等膨淳淳個麵包，口涎水強強就會跌下來哩！定著愛買一隻蔥仔包來過願，正甘願轉屋下。

「阿姆，佢肚屎枵哩，有麼個點心好食無？」這條還細個時節，同阿姆討食講個話，阿姆聽著子女做嬌，定著會想辦法變出東西，塞佢兜個豺嘴空。輒常係煎兩粒卵包，加一息仔豆油，赤赤個卵皮同半生熟個卵黃，划一碗飯盆頭伸個冷飯，簡單又飽足。下把仔會燜便兩錫盤個甜糯飯，自家種個圓糯仔，用大鑊蒸熟，攪烏糖同牛眼乾，就放在灶頭脣，細人仔讀書轉，書包仔一放就係去挖糯飯食，尤其係韌韌個牛眼乾，愛定定仔嚙，毋盼得忒遽吞落肚。

條逢著過節，粿仔、粽仔就愛按算加兜仔，蘿蔔粿、肉粿愛一大籠床，鹹粽、煨粽係用斗來算，就驚子女毋罣食，講乜奇怪，任阿姆仰仔算，該兜透日無閒正打得個粿仔、緝個粽仔，毋使兩日個光景，全部就分這兜豺狗囫到淨淨。輒常係阿姆肚飢想愛解粽仔食，正發現菜籃光圓圓仔，雖然會唸這兜孤盲頭恁搶食，還係會自家說一下：「細人仔盡精食，好食毋使人喊，毋好食佢毋動，做毋掣你兜食。」

換佢做阿姆，俵仔乜輒常問佢：「有麼個好食無？」去店項買斯異便利，毋過，就少忒一份阿姆個用心。尤其係食安問題爆發過後，大家開始注意食落肚個東西係麼個，有合規定無？想去想轉，就從盡愛食個麵包開始，自家上網尋資料、看影片、研究做法，一步一步慢慢仔進行，△麵糰、放發酵、等佢發、入烤箱、兜出爐，每一個過程，愛測著時間來，忒久會發到像菜瓜布，忒遽又毋罣發會硬確確仔，下下就愛細心細意，愛做一條靚靚個胖，講來簡單做起來斯無恁該。

恁想頭擺阿姆打粿仔，係無電腦個時代，乜無書好參考，幾多升糯米破幾多升粘米，愛放幾多斤蘿蔔仔；豬籠粿愛加艾仔，早早就去山項摘便；緝鹹粽個枸薑葉，係五月節個寶；七月半個煨粽，燂到軟習習仔。項項記到真真，自從毋識搞差。有一擺，佢問阿姆：「你仰般記得起恁多個東西？」阿姆總係笑笑仔講：「等你做阿姆自然就曉得哩。」

有影，子女個笑容對爺哀係盡大個鼓勵，爺哀個支持乜係子女打拚個動力。看著俵仔滿足個表情，歡喜個樣子，正經毋知麼個安到瘥，俵仔說恁一句就值哩。

作者：黃美貞

☆詞彙學習☆

【做嬌】zo gieu'：憑藉著對方的寵愛而肆意做出任何的嬌態。

【豺嘴空】sai' zoi kung'：貪吃的嘴。

【囫】fud：不客氣的吃。

【瘥】kioi：累、疲勞之意。

【光圓圓仔】gong' kuai' kuai' e'：一無所有的樣子。

【破米】po mi'：製作糕點時，將糯米和在來米以一定的比例混合。

【無恁該】mo' an' goi'：沒有這麼（那麼）容易。